



Komunikadu Imprensa

Periodu : Juñu 2011

Edisaun : 09 Juñu 2011

JSMP Marka Audiénsia ho Bispo Diocese Dili iha Câmara Eclesiástica da Diocese Dili Timór Léste

Iha loron 09 fulan Juñu 2011, Programa de Monitorizasaun do Sistema Judisiál ka JSMP hetan oportunidade diak hodi halo audiénsia ho Amo Bispo Diocese Dili, Mrg. Dom Alberto Ricardo iha nia servisu fatin, *Câmara Eclesiástica da Diocese Dili Timór Léste* iha oras tk 10:30 OTL. Marka prezensa iha audiénsia ne'e JSMP ho ninia equipa hamutuk ema nain neen (6), no husi parte Diocese nian aliende Amu Bispo rasik marka mós prezensia Amo Vigariu Jerál Diocese Dili nian.

Diretór Ezekutivu JSMP, Luis de Oliveira Sampaio; haktuir katak audiénsia ne'e ho objetivu prinsipal mak atu mobiliza apoiu husi Igreja Katoliku Timór no Intituisaun relijioza sira seluk atu fo kontribuisaun ba prosesu dezenvolvimentu setór justisa iha Timór Léste, tanbá ne'e JSMP hola iniciativa ida ne'e hodi hakbesik ba Dioseze sira iha Timór Léste atu oinsa bele konsolida komitmentu atu hametin setór justisa no defende prinsipiu sira ne'ebé konsagra ona iha ita Konstituisaun da Repúlika. Audiénsia ne'e, mós impoortante atu hatene besik liu tan pozisaun Igreja Katoliku nian konabá justisa iha Timór Léste.

Liu tan nia hatutan katak, Igreja desde uluk kedas iha influensia boot no representa kuaze maioria povu Timór Léste nia lian no Igreja iha pozisaun ida lejítimu iha aspetu hot-hotu atu defende interese povu nian. Tanbá ne'e ami hanoin katak involvimentu ativu Igreja no instituisaun relijioza sira nian importante teb-tebes iha prosesu dezenvolvimentu setór justisa iha Timór Léste.

Iha oportunidade ne'e, JSMP aproveita atu informa konabá JSMP ninia istoria no ninia papel no areas servisu ne'ebé durante JSMP halo atu kontribui hodi dezenvolve setór justisa iha Timór Léste no dezafiu ne'ebé durante ne'e JSMP infrenta.

Aliende ne'e, JSMP mós hato'o ninia preokupasaun balu ne'ebé comunidade sira hasoru dadaun relasiona ho kazu violénsia doméstika, abuzu seksual inklui kazu incestu (incest) ne'ebé oras ne'e dadaun akontese iha kuaze fatin hot-hotu iha teritoriu laran tomak.

Depoizde rona tiha intrudusaun konabá istoria no papel JSMP nian iha área justisa, progresu no dezafiu sira iha setór justisa nian, justisa ba krime grave sira iha tempu pasadu, kazu violénsia seksual, violénsia doméstika no kazu incestu, JSMP hola oportunidade ne'e atu husu apoiu moral

no *feed back* ruma konabá JSMP nia involvimenyu iha prosesu hirak ne'e. Ba oportunidade ne'e, antes atu klarifika ka hatan ba preokupasaun JSMP nian Amo Bispo Dom Alberto Ricardo hahu hodi hato'ó bemvindo no parabeins ba equipa JSMP ba esforsu ne'ebé JSMP halo ba setór ida ne'e. Tuir Amo-Bispo nia hanoin katak papél JSMP nian importante tebes hodi luta hari justisa ida ne'ebé forte no kredível ba povu Timór iha rai ida ne'e.

Tuir Amo-Bispo katak justisa ne'e hanesan asuntu ida ne'ebé vítal no tenke aplika ba ema hotu, tantu iha nivel sociedade, edukasaun, saude, no seluk-seluk tan. Aliende ne'e nia mós haktuir katak papel Igreja ninia klaru hori uluk kedas katak Igreja ninia prínsipiu mak atu defende ema nia vida umanu no dignidade ema nian iha mundu raik klaran bázeia ba justisa no lia los. Prinspius fundamentas hirak ne'e mak kompostu husi feto, mane, kiik ka boot kiak ka riku buat hirak ne'e hotu hanesan futar ilas Maromak nian ne'ebé ema hotu tenke respeita.

Liu tan iha Amo Bispo nia hateten katak hanesan umanu (ser-umanu) valor ida ne'ebé boot tebes ne'ebé labele sukat ho buat seluk, laiha buat ida ka ema ida ka entidade ida nia direitu hodi prejudika fali ema seluk nia direitu.

Antes Amu Bispo Dom Ricardo konklui ninia esplikasaun nia mós hato'ó dala ida tan bemvindo ba JSMP tanbá JSMP hanesan uniku sociedade civil ida ne'e ne'ebé servisu hare liu ba area justisa, nia mós husu atu JSMP tenke nafatin iha esperitu ida ne'ebé forte no tenke badinas hodi luta hari jusita ida ne'ebé forte, justu no kredível ba povu Timór oan tomak iha rai doben ida ne'e.

Atu hetan informasaun liu tan bele kontaktu direitamente ba:

Luis de Oliveira Sampaio
Diretór Ezeutivo JSMP
Diresaun e-mail : luis@jsmp.minihub.org
Telefone : (+670) 3323882/7295795